



REPUBLIKA E KOSOVËS - REPUBLIKA KOSOVO	
KOMUNA E VUSHTRRISË-OPËSTINA VUÇITRN	
01 Nr. / Br	36 / 24
Nr. i fq. / Br. et	- 21 -
Data: / Datum	07.03.2024
VUSHTRRI - VUÇITRN	



REPUBLIKA E KOSOVËS

KUVENDI I KOMUNËS-VUSHTRRI

PROCESVERBAL
NGA MBLEDHJA E -I- E RREGULLT E KUVENDIT TË KOMUNËS SË
VUSHTRRISË, MBAJTUR MË 25 JANAR, VAZHDUAR MË 01 SHKURT 2024

Mbledhja është mbajtur në sallën e Kuvendit të Komunës së Vushtrrisë, duke filluar në orën 10:20. Në këtë mbledhje ishin të pranishëm anëtarët e Kuvendit të Komunës së Vushtrrisë:

Adnan Lahu, Agim Bregaj, Ali Januzi, Agron Përçuku, Alban Bajrami, Behar Duraku, Bekim Zabërgja, Blerina Shala, Bujar Pllana, Edona Gashi, Faton Hyseni, Galip Audiu, Gresa Muli, Gentiana Rama, Ilmi Azemi, Kushtrim Hyseni, Leonora Gërguri, Fakte Dushi, Fatmire Cecelia, Jeton Gjaka, Mek Selaci, Refik Maloku, Melihate Basholli-Latifi, Mensur Kasumi, Mensur Kastrati, Mentor Hasani, Nurie Halili, Nurten Çerkezi-Gjyshinca, Shkelzen Xhaferi, Spasoje Stefanoviq, Sylejman Meholli, Ymer Haradinaj dhe Zojë Hajrizi.

Munguan: Arlind Gogolli dhe Nasuf Aliu.

Mbledhjen e hapi dhe e kryesoi Melihate Basholli-Latifi, – kryesuese e kuvendit, e cila konstatoi se në sallë janë prezent 33 anëtarë të kuvendit, kuorum i mjaftueshëm për zhvillimin e punimeve të mbledhjes plenare dhe për marrje të vendimeve të plotfuqishme, andaj procedoi me rendin e ditës.

Të pranishëm në këtë mbledhje ishin edhe Kryetari i komunës, z. Ferit Idrizi, përfaqësuesi i KFOR-it, përfaqësuesi i OSBE-së, përfaqësues të mediave të shkruara dhe elektronike, përfaqësues të shoqërisë civile.

Faton Hyseni, anëtar i kuvendit-pasi uroj për një fillim vit të mbarë kërkoj nga të gjithë anëtarët e kuvendit të kenë një bashkëpunim të sinqertë dhe projektet që janë në të mirë të përgjithshme ti mbështesin dhe ti shtyjnë përpara, ndërsa të kundërshtojnë aty ku ka keqmenxhim keqpërdorim dhe keqebërje.

Leonora Gërguri, anëtare e kuvendit-ngriti shqetësimin e adresuar nga qytetaret lidhur me një vend punishte në rrugën “GJ.K. Skënderbeu” përballë Akademisë Policore ku në atë vend është bllokuar rruga dytësore si dhe ka filluar shembja e tereni dhe kësisoj ka rrezik të shembjes së rrugës kryesore. Pyetja e saj për këtë çështje është se a janë duke u monitoruar nga komuna këto vendpunishte. Më tej pyeti lidhur me atë se para pak kohe kryetari i komunës ka pezulluar punimet në 6 objekte ndërtimore banesore, për çfarë është bërë ky pezullim a kanë pasur leje këto objekte sepse në njërin nga këto objekte është bërë gërryerja deri në cepin e rrugës dhe të shtëpive përreth duke shkaktuar kështu rrezik të përgjithshëm. Pastaj lidhur me planin e prokurimit të prezantuar nga kryetari i komunës thuhet se për vitin 2024 parashihen rreth 9 milion euro për investime

kapitale, gjë kjo e cila nuk është e saktë sepse në shtator 2023 kur është aprovuar buxheti i komunës kemi pasur 6 milion euro për investime kapitale.

Ymer Haradinaj, anëtar i kuvendit-diskutimi i tij u orientuar në një kërkesë të banorëve të fshatit Stanoc i Epëm lidhur me largimin e një deponie të mbeturinave, e cila gjendet mbi lagjen "Haradinaj" dhe kjo është një pengesë për banorët lokal të atë vend. Lidhur me këtë kërkoj opinionin e Drejtorit të Prokurimit, i cili në kohën kur ka qenë asamblistë e patë ngritur këtë shqetësim për këtë deponi mbeturinash, andaj ky i fundit a do të veproj në këtë drejtim për asgjësuar këtë deponi.

Adnan Lahu, anëtar i kuvendit-tha se në dy vitet qeverisje të Ferit Idrizi, nuk di se për çfarë do mbahet mend ky kryetar përpos pastrimin e lumenjve dhe rregullimin e kanalizimit. Pastaj çështja e projektit të ujit është shumë larg realizimit dhe ky projekt ka mbetur aty ku e kishte lënë qeverisja e kaluar e LDK-së.

Ilmi Azemi, drejtor i Drejtorisë së Prokurimit-njoftoi se plani i prokurimit i prezantuar nga kryetari i komunës është identik me planifikimin buxhetor të raportuar dhe aprovuar nga ana kuvendit të komunës. Lidhur me këto çështje duhet pasur parasysh se komuna ka lidhura kontrata njëvjeçare dy dhe trevjeçare varësisht nga natyra e projekteve investive. Dhe e rëndësishme të kuptohet është fakti se komuna ka në dispozicion një buxhet për projekte kapitale të aprovuar pak më shumë se 6 milion euro, ndërsa vlera e projekteve kapitale investive është afër 9 milion euro. Lidhur me çështjen e dopnisë së mbeturinave në fshatin Stanoc i Epëm, u zotua se shpejt do të merren veprimet e nevojshme për ta asgjësuar por do të veprohet edhe në drejtimet tjera ku ato gjenden.

Sylejman Mehulli, anëtar i kuvendit-pyeti se drejtorin e Drejtorisë së Financave, se buxheti i komunës që është aprovuar, në kuvend a ka mbetur i njëjtë në kodet buxhetore, për faktin se edhe atëherë kur është votuar ai ka tërhequr vëmendjen se është duke u votuar buxheti gabimisht me një shabllon, copy-past nga viti 2023 dhe për këtë në bazë të një hulumtim që ka bërë shihet që ka ndryshime dhe këto ndryshime janë në kundërshtim me ligjin, pasi që kur aprovohet buxheti ai bëhet ligj për komunën si organizatë buxhetore. Në bazë të kësaj ai ka informata se ato janë ndryshuar dhe nëse kjo ka ndodhur ai ato do ti dërgoj tek prokuroria e shtetit.

Agron Përçuku, anëtar i kuvendit-ngriti shqetësimin e tij lidhur me një projekt të KEDS-it, që po zhvillohet në fshatin Sllakoc-Samadrexh-Ceceli dhe Dumnicë, ku shtyllat elektrike të betonit po vendosen në kanalet e ujit dhe po bllokohen kanalet atmosferike, dhe pyeti sa ka marr leje KEDS-i nga Komuna e Vushtrrisë për vendosjen e këtyre shtyllave. Po ashtu shqetësuese është edhe vendosja e një shtylle elektrike metalike në hyrje të qytetit në ç' rast është bllokuar trotuar nga të dy anët e kalimit të qytetarëve, edhe për këtë pyeti se a është mbikëqyrur dhe a është marrë leje para se të vendoset kjo shtyllë.

Sylejman Mehulli, anëtar i kuvendit-propozoi që të futet në rendin e ditës propozim-vendimi për amandamentimin e vendimit Nr.47/20 të datës 27.02.2020 për ndarjen e mjeteve financiare për fëmijët e porsalindur në Komunën e Vushtrrisë, ku vlera aktuale është 120 €, por duke parë shkallën e inflacionit por edhe komunat tjera të cilat kanë vepruar, propozoi që kjo vlerë nga 120 € të rritet në 250 €

Lorik Maxhuni, drejtor i DSHPS-së-tha se kostoja aktuale e këtij subvencionimi për fëmijët e porsalindur Komunës së Vushtrrisë i kushton mbi 130,000.00€ që është një barrë jashtëzakonisht e madhe për ne si komunë dhe drejtori. Pastaj shtoi se kupton kalkulimin politik të parive politike në kuvend për të përfituar vota, por kjo nuk logjik të shëndosh. Më tej shtoi se çështje tjera më të rëndësishme që duhet menduar të futen për subvencionim siç është ajo për të sëmuret me sëmundje të rënda kaceroze dhe tomore, të cilëve nuk po mundem tu dalim në ndihmë. Prandaj vlerësoi se

nuk duhet të ngutemi në vendim por ndoshta do të ishte mirë të bëhet një komision nga pozita dhe opozita për ta analizuar këtë çështje.

Isuf Jashari, drejtor i DBF-së-sqaroi se përderisa është aprovuar, buxheti i komunës për vitin 2024, atëherë duhet ditur se cili pozicion duhet anuluar për ta mbështetur propozimin për subvencionimin e fëmijëve.

Sylejman Mehulli, anëtar i kuvendit-sqaroi se në Komunën e Vushtrrisë, kemi afër 900 lindje të fëmijëve në vit, ndërsa kostoja propozimit është pak më shumë se 100.000 €, ndërsa anomalia e kësaj është se në këtë rend ditët është ardhur propozimi që Ndërmarrjes “Përparimi” ti ndahen subvencion 190.000 €. Më tej për shujtat e shërbyesve civil, ku do të merren mjete pyeti Drejtorin e Financave. Andaj propozoi që rritja e subvencioneve për fëmijët të bëhet edhe nga drejtorit tjera komunale jo vetëm nga ajo e shëndetësisë. Krejt në fund pa dashur që ti japim kahe politike, kërkoj që propozimi i tij të futet në votim dhe të përkrahet nga të gjitha grupet politike në kuvend.

Adnan Lahu, anëtar i kuvendit-tha se duhet të jemi të kujdesshëm kur marrim, vendimi e po ashtu edhe kur dëshirojmë ti anulojmë ato, sepse nuk është e rrugës se si të ndërrohet qeverisja lokale të ndërrohen të gjitha vendimet sepse kështu prishet vazhdimësia e funksionimit të komunës dhe kjo është e dëmshme.

Lorik Maxhuni, drejtor i DSHPS-së-vlerësoi se e mbron qëndrimin e tij se ky vendim për subvencione duhet të shfuqizohet, sepse subvencionet në shumë raste nuk sjellin zhvillim por stagnim, prandaj duhet të fillohet të mendohet në staza të zhvillimit afatgjatë e jo të mendohet për kalkulim elektorale ditore dhe afatshkurtra.

Sylejman Mehulli, anëtar i kuvendit-tha se është mirë të shtyhet përpara kjo çështje, sepse gjendje është e rënd, dhe kjo do të ndihmonte sadopak në zbutjen e kësaj gjendje. Edhe në vitin 2020 kur është marr ky vendim atëherë është lënë mundësia që mjetet të merren edhe nga drejtoritë tjera ku ka mundësi financiare.

Adnan Lahu, anëtar i kuvendit-tha se pas diskutimeve që u bën është i mendimit që të formohet një komision që të shikohet se a ka mundësi ligjore dhe financiare të ndryshohet një vendim i tillë për rritjen e mjeteve për fëmijët e porsalindur.

Sylejman Mehulli, anëtar i kuvendit-tha se sinqerisht është për keqardhje ndryshimi brenda minutave i opinionit të anëtarëve të kuvendit, dhe deklaroi se ta shohin të gjithë qytetaret se kush po i mbron interesat e përgjithshme e kush po i kundërshton ato.

Në vazhdim kryesuesja e kuvendit konstatoj se në sallë janë 30 anëtarë të kuvendit kuorum i mjaftueshëm për të marr vendim dhe i procedoj një nga një pikat në të ndryshme për votim dhe atë si vijon:

Me vota 29 vota “për” 2 vota “abstenim” u aprovua për të hyrë në rendin e ditës propozim-vendimi për miratimin e nismës të kryetarit të komunës për bashkëpunim ndërkomunal.

Me 30 vota “për” 1 votë “abstenim” u aprovua për të hyrë në rendin e ditës propozim-vendimi për shfuqizimin lidhur me miratimin e Planit për Integritet.

Me vota “unanime” u aprovua për të hyrë në rendin e ditës propozim- vendimi për ndryshimin e vendimit Nr.289/23 i datës 28.12.2023 për ofrimin e ndihmës financiare për z.Nasuf Aliu.

Lidhur me propozimin për ndryshimin e vendimit Nr.47/20 të datës 27.02.2020 për ndarjen e mjeteve financiare për fëmijët e porsalindur në Komunën e Vushtrrisë, gjegjësisht rritja shumë financiare nga 120 në 250 €, kryesuesja e hodhi në votim këtë propozim, ku rezultati i votimit ishte 9 vota “për” dhe 9 vota “kundër” në ç’ rast ishte shfrytëzuar vota e dyfishtë e kryesueses së kuvendit, e cila konstatoj se një propozim i tillë nuk aprovohet për shqyrtim në rendin e ditës.

Më pas opozita reagon duke deklaruar se ishte edhe një anëtar i kuvendit të cilit nuk i ishte numëruar vota e tij, e që pretendimi ishte se kjo votë ka qenë “pro”. Në këtë rast u kërkua të shikohet video-incizimi, mirëpo tek pjesa e votimit incizimit kishte pasur defekt.

Në vazhdim kryesuesja e kuvendit lidhur me propozimin për plotësimin dhe ndryshimin e vendimit Nr.47/20 të datës 27.02.2020 për ndarjen e mjeteve financiare për fëmijët e porsalindur në Komunën e Vushtrrisë, deklaroi se pas disa defekteve që patë në sistemin e incizimit vizuel të seancës, nuk po mund të konstatohen saktë numri i votave për këtë pikë, prandaj mënyra e vetëm për të dal nga kjo situatë është përsëritja e këtij votimi, sepse sipas saj ajo ka konstatuar vetëm pjesën e parë të kësaj pike të rendit të ditës por jo edhe për pjesën e dytë, që është propozim-vendimi për formimin e komisionit.

Faton Hyseni, anëtar i kuvendit-tha se kjo çka po ndodhë është një turp i kësaj qeverie komunale, për faktin se nuk e kishte besuar se do të bien në këso gjendje, sepse po thuhet se nuk po shihet, por deklaroi se vota e tij ka qenë “për” dhe ka përfunduar gjithçka sipas tyre votimi ka qenë 9- 9 pro dhe kundër, dhe kur u deklarua se ka votuar edhe anëtari i kuvendit **Faton Hyseni atëherë del se rezultati i votimit është 10 “për” ndërsa 9 vota “kundër”**. Dhe tani në këtë situatë duhet të shfuqizohet ai votim dhe kjo nëse ka drejt ligjore dhe më tej të vazhdohet votimi, prandaj shtoi se kjo situatë e fshehjes së gjërave është e turpshme dhe nuk është as në traditën e shqiptarëve.

Agron Përçuku, anëtar i kuvendit-tha se pas konstatimit të kryesueses së kuvendit se nuk ka kaluar ajo pikë e rendit të ditës, atëherë nuk mbetet gjë tjetër veç të kalohet në pikën e radhës, ndërsa të gjithë tjerët që mendoj se ka pasur paqartësi dhe parregullsi në votim mund të ankohen në MAPL, sepse nëse kthehesh mbrapa atëherë bënë shkelje ligjore.

Sylejman Mehulli, anëtar i kuvendit-tha se ajo çfarë po ngjan në këtë kuvend vërtet është e turpshme, është e paprecedent, nuk është hera e parë që dikush nga teknologjia bënë kesi lloj veprimesh edhe tek fjalimet edhe tek drejtimi i kamerës, sepse nuk është çudi se kur përfundon në IT dhe në kamerë nga zyrtari i administratës së partisë në zyrtar i administratës së kuvendit komunal atëherë pritet gjithçka që të ndodh. Andaj kryesues asnjë fuqi nga jashtë nuk e prevalon vullnetin e të zgjedhurve të popullit dhe deklarimin e tyre në votim, nuk ka sekretari që mund ta ndryshoj vullnetin e lirë të shprehur nga qytetarët, nëse ka gabim atëherë keni obligim të përmirësoni gabimin në bazë të deklarimit të anëtarit të kuvendit. Kjo tregon për nivelin e vërtet të qeverisjes së Ferit Idrizit kjo është e turpshme!

Në vazhdim kryesuesja i dha fjalën drejtorit të Drejtorisë së Shëndetësisë për tu deklaruar, ndërsa filloj protestimi me trokitej në tavolinë i grupeve dhe anëtarëve nga opozita, për këtë kryesuesja mori pauzë prej 10 minutave.

Pas pauzës dhe pas konsultimeve, kryesuesja e kuvendit deklaroi se me qellim të heqjes së çdo dileme, lidhur me procesin e votimit e dërgoj në votim të përsëritur propozim-vendimin

për ndryshimin dhe plotësimin e vendimit Nr.47/20 të datës 27.02.2020 për ndarjen e mjeteve financiare për fëmijët e porsalindur në Komunën e Vushtrrisë, ashtu që të rritet vlera e mjeteve financiare nga 120 € në 250 €, pas votimit ky propozim nuk more *asnjë votë “për”*, ndërsa 13 anëtarë të kuvendit votuan *“kundër”* kësisoj kryesuesja konstatoj se kjo pikë nuk aprovohet për futej në rendin e ditës.

Më pas kryesuesja e hedhi në votim propozim-vendimin për formimin e komisionit lidhur me shqyrtimin e gjendjes për ofrimin e ndihmës për fëmijët e porsalindur, pas votimit ky propozim mori 18 vota *“për”* asnjë kundër asnjë abstenim dhe kësisoj u aprovua për rend dite.

Në fund të debatit jashtë rendit të ditës dhe për rendin e ditës, Kuvendi pas votimit me 22 vota *“për”* aprovoi këtë:

R E N D I T E

1. Shqyrtimi dhe aprovimi i procesverbalit nga mbledhja e rregullt e Kuvendit të Komunës së Vushtrrisë, mbajtur më datë 28 dhjetor 2023;
2. Shqyrtimi i Raportit të shpenzimeve për periudhën janar – dhjetor 2023;
3. Shqyrtimi dhe aprovimi i Propozim – vendimit për pagesën e shujtave ditore për zyrtarë të administratës së komunës;
4. Shqyrtimi dhe aprovimi i Propozim – vendimit për ndarje të mjeteve financiare - Ndërmarrjes Publike Lokale “Përparimi” SH.A në Vushtri;
5. Shqyrtimi dhe aprovimi i Propozim – vendimit për ndarje të dekoratës “Nderi i Qytetit” për Heronjtë e Kosovës: Enver Zymberi (post mortum) dhe Afrim Bunjaku (post mortum);
6. Shqyrtimi dhe aprovimi i Propozim – vendimit për financim të shkollimit të fëmijëve të Heronjve të Kosovës: Enver Zymberi dhe Afrim Bunjaku;
7. Shqyrtimi i Propozim – vendimit për ndryshim dhe plotësim të vendimit për KKSB-në;
8. Rishqyrtimi i vendimit të kuvendit nr.289/23 i datës 28.12.2023 për ofrimin e ndihmës financiare për z.Nasuf Aliu;
9. Shqyrtimi dhe aprovimi i Propozim – vendimit për shfuqizimin lidhur me miratimin e Planit për Integritet;
10. Shqyrtimi dhe aprovimi i Propozim – vendimit për miratimin e nismës të kryetarit të komunës për bashkëpunim ndërkomunal;
11. Shqyrtimi dhe aprovimi i Propozim – vendimit për formimin e komisionit lidhur me shqyrtimin e gjendjes për ofrimin e ndihmës për fëmijët e porsalindur;
12. Pyetje dhe përgjigje.

1. Shqyrtimi dhe aprovimi i procesverbalit nga mbledhja e rregullt e Kuvendit të Komunës së Vushtrrisë, mbajtur më datë 28 dhjetor 2023;

Pas shqyrtimit të kësaj pike të rendit të ditës, Kuvendi me 23 vota “për”, aprovoi procesverbalin nga mbledhja rregullt e Kuvendit të Komunës së Vushtrrisë, mbajtur më datën 28 dhjetor 2023.

2. Shqyrtimi i Raportit të shpenzimeve për periudhën janar – dhjetor 2023;

Adnan Lahu, anëtar i kuvendit-tha se raporti i shpenzimeve për periudhën janar-dhjetor 2023 është dëshmia më e mirë, e keqqeverisjes dhe keqmenaxhimit të kësaj qeverisje lokale në Komunën e Vushtrrisë. Në i shikojmë të hyrat vetanake sipas drejtorive komunale dhe kodeve ekonomike, i kemi afër gjysmë milioni me tepër të inkasuar në vitin 2023 por kjo ka ardhur si rezultat i rritjes së tatimit në pronë. Tabela tjetër shpenzimet sipas burimeve të financimit tek kodi 10 nga bashkëfinancimi i kemi 600 mijë ero të humbura që kanë shkuar në suficit që nuk i kemi shfrytëzuar për projektet zhvillimore për Komunën e Vushtrrisë. Hiq më mirë nuk qëndron gjendja tek kodi 21 dhe 22 i të hyrave ku në total kemi të pashfrytëzuara 636, 000.00 €, e kemi parasysh se këto mjetet mund të barten këtë vit por gjithsesi se edhe këtu kemi humbje. Në tabelën tjetër sipas kategorive të larta të shpenzimeve këtu kemi një pasqyrë jo reale të të dhënëve ashtu siç është dashur të jetë p.sh shohim se shënon se kemi buxhet të planifikuar rreth 9 milion euro ndërsa realizimi i buxhetit 8.1 milion euro ose në përqindje 95%, por kjo ka ndodhur që 2.1 milion euro janë shkuar për mbulimin e obligimeve nga vendimet gjyqësore d.m.th mjetet e dedikuara për projekte kapitale janë shkuar për pagesat për vendimet gjyqësore dhe kështu shpenzimi i buxheti për investime kapitale bie në 5.9 milion euro dhe kësaj shume nëse ia shtojmë edhe shumën e avanseve që komuna i ka paguar në vlerë prej 600 mijë euro pagesa për punët që akoma nuk kanë filluar, kështu del se buxheti është shpenzuar në vlerën 5.3 milion euro apo në përqindje 59%, që afërsisht jemi aty sikurse në vitin e kaluar dhe qytetaret e Vushtrrisë duhet ta dinë se gjysma e projekteve për këtë vit fiskal kanë dështuar në Komunën e Vushtrrisë. Pastaj tek mallrat dhe shërbimet kodi 13440 në vitin 2023 janë shpenzuar 52.000.00 € shërbime të ndryshme intelektuale dhe këshillëdhënëse, dhe në këtë kod kryetari i komunës iu ka dhënë kontrata shokëve dhe shoqeve të tij, të afërmeve dhe militantëve të tij partiak, në kodin ekonomik 13820 avans për udhëtime jashtë vendit shuma në raportin vjetor që është shpenzuar është 28.400 €, por çuditërisht në raportin nëntëmujor kjo shumë është më e madhe se sa në raportin vjetor ku kjo shumë figuron 32,000.00€ pyeti si është e mundur kjo. Por sipas informatave që ka ai kjo shumë vjetor del të jetë mbi 70 mijë euro, dhe kërkoj nga drejtori i DBF-së që ta konfirmoj këtë. Fatkeqësisht atje ku është dashur të shpenzohet më shumë është shpenzuar më pak p.sh tek mirëmbajtja e ndërtesave, mirëmbajtja e shkollave, mirëmbajtja e objekteve shëndetësore për këtë të fundit janë shpenzuar 655 € dhe kjo është shumë keq. Në fund duke ju referuar një komenti ku ceket se mbetja për bartje të mjeteve nga investimet kapitale për vitin 2024 është në vlerë prej 900.000.00 € dhe duke pasur parasysh se kemi edhe 500 mijë euro tejkalime nga të hyrat e komunës gjithashtu 600 mijë euro që barten nga fondi 21 dhe 22 dhe mbledhur të gjitha këto mjete në total del se të gjitha këto nuk po i mbulojnë kostot për të gjitha projektet kapitale të planifikuar për vitin 2024 dhe për këtë pyeti kryetarin e komunës se cilat projekte do të hiqen nga lista e projekteve për tu realizuar në vitin 2024.

Sylejman Mehulli, anëtar i kuvendit-duke ju referuar raportit vjetor të shpenzimit të buxhetit vlerësoi se në kushte normale kur një qeverisje performon mirë është dashur të pritet me padurim dhe me krenari prezantimin e këtij raporti, mirëpo kur kemi të bëjmë me një qeverisje skandaloze të dështuar, e cila nuk ka ditur të menaxhoj tash e dy vite ku me dhjetëra milion euro kanë shkuar në suficit, këtu i pengon edhe incizimi i mbledhjes dhe nga zyrtari përgjegjës ku po mundet edhe po prehet incizimi. Kur bëhet fjalë për 90 projekte kapitale që janë votuar nga ana e këtij kuvendi, për ti gëzuar qytetaret e Komunës së Vushtrrisë, por prej këtyre projekteve shuma prej 3,5200.166 € nuk kanë shkuar në adresim për çfarë janë votuar, prej tyre 909,255.00 € kanë mbetur suficit, kurse shumën prej 2, 142.911 € i ka marrë përmbaruesi. Prandaj ai duke ju adresuar qytetarëve të Komunës së Vushtrrisë, deklaroi se kryetari i komunës në rrjetet sociale ka paraqitur kryevepra dhe mega projekte në investime, por deklaroi me përgjegjësi të plotë se projekti më i madh i këtyre dy viteve i qeverisjes Idrizi, quhet përmbaruesi Atip Mustafa 1,750.788 € i ka marrë nga projektet

kapitale të planifikuara të realizohen në të gjitha lokalitetet e Komunës së Vushtrrisë në vitin 2023, kjo është e vërteta dhe dikujt mundet të mos i pëlqej në incizim. Në vazhdim ai përmendi disa nga projektet kapitale që janë votuar e të cilat si rezultat i të cekurave më lart nuk do të realizohen: ndërtimi i vigave mbi lumin “Silnica” “Terrstena” 60 mijë ero nuk do të realizohet sepse paratë i ka marrë përmbaruesi, Kolektori kryesor Nadakoc-Studime 60 mijë ero, Kolektori kryesor Sfaraçak 60 mijë ero, ndërtimi i rrugëve me kubëza “Adem Ademi” 25,514 €, ndërtimi i trotuarit “Sadri Maksuti” 10,000.00 €, sinjalizimi horizontal dhe vertikal 25,000.00 €, sinjalizimi digjital 20,000.00 €, zgjerimi i rrjetit në Pasomë 60, 000.00 €, zgjerimi i rrjetit të ujësjellësit Beçiq-Duboc 50,000.00 €, zgjerimi i rrjetit të ujësjellësit Stanco-Dumnicë 170,000.00 €, zgjerimi i rrjetit të ujësjellësit në Mihaliq 80,000.00 €, zgjerimi i rrjetit të ujësjellësit në Prelluzhë 5000 €, ndërtimi i shesheve dhe parqeve 20,000.00 €, blerja e veturave për administratën komunale 20,000.00€, rregullimi i shtratit të lumit “Tërrsten” 95,000.00 €, ndërtimi i urës mbi lumin “Podranqa” 50,000.00 €, blerja e automjeteve për zjarrfikësit 14,000.00 €, blerja e pajisjeve për zjarrfikësit 50,000.00 €, blerja e sistemit të montimit të alarmit 8000 €, projektit me bashkë donator në Drejtorinë e Bujqësisë 280,000.00 €, asfaltimi i rrugës në Prelluzhë 5613 €, ndërtimi i rrugës “Avni Saraçi” 62,000.00 €, nderimi i rrugës “2 maji” me infrastrukturë 129,000.513 €, ndërtimi i rrugës “Boletini” 29,000 789 €, asfaltimi i rrugës “Rasim Tahiri” 13,445 €, ndërtimi i parkut tek Shkolla Ali Kelmendi 10,000 €, asfaltimi i rrugës në Dumnicë 12,000.00 €, asfaltimi i rrugës në Ceceli 8724 €, asfaltimi i rrugës në fshatin Akrashticë 81,987.00 €, asfaltimi i rrugës në fshatin Balicë 5946 €, asfaltimi i rrugës në fshatin Doberllukë 21,459.00 €, asfaltimi i rrugës në fshatin Begaj 13,000.00 €, asfaltimi i rrugës në fshatin Pasomë 5000 €, blerja e veturës për shërbimet rezidenciale 3863 €, ndërtimi i ndihmës objektit të stadiumit Ferki Aliu 20,000.00 €, ndërtimi i pllakave përkujtimore në fshatin Pasomë 20,000.00 € restaurimi dhe konstruktimi i objektit të Arkivit Historik 20,000.00 €, ndërtimi i një skulpture me karakter historik 22,000.00 €, renovimi i palestrës “Jeton Tërstena” 28,000.00 €, renovimi i çerdhes 26,000.00 €, ndërtim i kaldasë për ngrohej në shkollën “Lutfi Musiqi” 10,878 €, të gjitha këto projektet që i numëroj nuk janë realizuar në vitin 2023 sepse kanë shkuar tek përmbaruesi, edhe pse këto kuvendi i ka aprovuar por këto nuk janë realizuar dhe kësaj është humbur mundësia për zhvillim të komunës sonë dhe ofrimin e kushteve më të mira për qytetarët tanë. Sipas drejtorive komunale humbjet janë infrastruktura publike 1,67000.504 €, zjarrfikësit dhe inspektimet 34,000.00 €, menaxhimi i fatkeqësive 8000 €, bujqësia 289,000.496 €, planifikim, urbanizmi dhe inspeksioni 446,000.650€, shërbimet e shëndetit primar 50,000.00 €, shërbime rezidenciale 13863 €, shërbime kulturore 145,000.100 €, arsimit para fillor-çerdhet 37,822 €, arsimit fillor 8000 €, arsimit mesëm 41,474 €. Përmbaruesi privat këto mjetet nuk do i kishte marrë sikur këto projektet do të realizoheshin para muajit dhjetor 2023, por meqë projektet nuk janë realizuar me qellim që të dilet pak më mirë në këtë raport financiar, kanë arritur një marrëveshje për të realizuar kontrata e punëtorëve të arsimit që ku takojnë me kontratën kolektive, por sikur komuna të kish performuar si duhet dhe të kishte aplikuar ankesë, mjetet nuk do të kishin shkuar në këtë formë, ai e mirëpret dhe i gëzohet faktit që mësimdhënësit i kanë marrë mjetet që iu takojnë sepse buxheti ka mundur të shkojë komplet në suficit, me gjithë këtë kjo formë e shpenzimit të buxhetit bazuar në ligjin për buxhetin e Republikës së Kosovës ku brenda ditësh bëhen transaksione miliona euro është pistë e hapur për Prokurorinë dhe krimet ekonomike. Kushdo që i konteston këto të dhëna le ta kontestoj Drejtorin e Drejtorisë për Buxhet dhe Financa sepse ai e ka sjellë këtë raport. Në fund tha se qeveria i ka gënjer qytetarët kur i ka votuar projektet për të realizuar në vitin 2023 dhe ka dështuar në realizimin e tyre, ndërsa paratë i ka adresuar në një drejtim krejt tjetër tek përmbaruesi privat.

Benjamin Shala, drejtor i Drejtorisë së Shërbimeve Publike-tha se raporti i cili është sjell është i sakët por interpretimi i tij nga z.Meholli është 99 % i pasaktë, sepse duhet pasur parasysh se dallojë shumat e planifikuara nga shumat e kontraktuara, shumica e projekteve janë realizuar ato janë të prekshme dhe disa janë në procedurë e sipër, por me qëllim po tentohet të krijohen situata të pa qarta para qytetarëve.

Ilmi Azemi, drejtor i Drejtorisë së Prokurimit-në diskutimin e tij bëri një pyetje publike për parafolësit, se çfarë mendojnë qytetarët kur i dëgjojnë këto diskutime të tyre, kur buxheti për vitin 2023 është shpenzuar në masën 95%. Tutje shtoj se deputeti Meholli, preku shumë tema të cilat i ka devijuar në masën 90%, sepse ai nuk e kupton strukturën e investimeve kapitale. Më tej shtoj në adresë të z.Meholli se a është i gatshëm të kërkoj falej publike, për ato projekte që i përmendi si të dështuara, e që nuk është e vërtetë sepse shumica e tyre janë në realizim e sipër, d.m.th diskutimi i tij është mashtrim. Lidhur me suficitet buxhetore sqaroi se konstatimet e sipër cekura janë të paqëndrueshme, sepse në procedurat e prokurimit mund të ketë kursime në projekte të caktuara. Çështja e përmbarimit, ceku se nuk është mirë ti jepet konotacion negativ sepse kemi të bëjmë me një marrëveshje që ka arritur kryetari i komunës me avokatet për realizimin e një të drejte ligjore që iu ka takuar mësimdhënësve nuk është mirë të fyhet intelijenca e 1200 arsimtarëve që janë në Komunën e Vushtrrisë. Në bazë të kësaj marrëveshje janë kursyer rreth 1 milion euro shpenzime gjyqësore dhe pagesa e këtyre obligimeve do të bëhet me dy pjesë. Ai shtoj se si qeveri janë të lumtur që kjo marrëveshje është përmbyllur deri në një masë dhe mësimdhënësit i kanë marr mjetet e tyre.

Sylejman Meholli, anëtar i kuvendit-duke replikuar ceku se me shifra dhe emër është e evidentuar se cilat projektet kanë dështuar të tjerat që fare nuk kanë filluar, dhe krejt kjo ka ndodhur si rezultat i paafësisë së kësaj qeverie komunale.

Adnan Lahu, anëtar i kuvendit-tha se buxheti për kapitale është shpenzuar në vlerën 8 milion euro, por që ky buxhet nuk është dedikuar për qytetarët, sepse e dimë që një pjesë bukur të madhe i ka marr përmbaruesi dhe një pjesë janë paguar avansë, d.m.th. shuma që komuna e ka realizuar për investime kapitale është 5.3 milion euro, dhe pyetja konkrete është se mungojë afër 3 milion euro për të mbuluar realizimin e projekteve kapitale për vitin 2024 pyetja është se ku do të merren këto mjete.

Ymer Haradinaj, anëtar i kuvendit-tha se në raport evidentohet se kemi një shpenzim të buxhetit rreth 95%, por jo në realizim të projekteve, pra projektet nuk janë realizuar ashtu siç kanë qenë të planifikuara për vitin 2023. Realizimi i buxhetit për 2023 është bërë në këtë masë për faktin se përmbaruesit privat i kanë marrë komunës mbi 2 milion euro për kryerjen e obligimeve ndaj punëtorëve të arsimit obligime që burojnë nga Kontrata Kolektive e Arsimit e nënshkruar në vitin 2017 mes MASHTI dhe SBASHKU. Edhe për kundër kësaj prapë shihet se kemi mos shpenzim të buxhetit tek investimet kapitale nga mbi 9 milion që kanë qenë të planifikuara janë shpenzuar mbi 8 milion euro që i bie sa afër 1 milion euro kanë mbetur të pashpenzuara. Duke ditur se shumë lagje dhe fshatra të Komunës së Vushtrrisë nuk kanë ujë të pijes, nuk kanë kanalizime dhe trotuare, ndriçim publik etj, mos realizimi i buxhetit në projekte kapitale për vitin 2023, është dëshmi për dështim të qeverisjes lokale dhe mos realizim të premtimeve nga kryetari Ferit Idrizi. Nga tabelat për mallrat dhe shërbime për periudhën janar-dhjetor 2023 janë dal këto të gjetura se për udhëtime brenda vendit nga 756 € sa kishim në vitin 2023 kjo shifër është rritur në 3131 € në vitin 2023, shpenzimet e udhëtimit zyrtar jashtë vendit nga 3260 € kemi rritej 13,674 €, shpenzime tjera të udhëtimit zyrtar jashtë vendit nga 1731 € kemi rritje në 13,532 €, shpenzime tjera intelektuale dhe këshillëdhënës nga 541 € në 52,652 €, dhe shpenzime të vendimeve gjyqësore nga 18,612 në

254,681 €, nga këto raporte shihet se kemi dështim në realizimin e projekteve dhe dështim në menaxhimin e parasë publike.

Fatmire Cecelia, anëtare e kuvendit-duke u bazuar në raport vlerësoi se si rezultat i keqmenaxhimit të kësaj qeverie, shumë mjete kanë shkuar në suficit dhe shumë projekte kanë dështuar për të cilat ndjen keqardhje për të gjithë ata qytetar që kanë mbetur pa këto projekte. Veçanërisht ndjen keqardhje që në fushën e rinisë nuk është realizuar asnjë projekt dhe të gjitha mjetet kanë shkuar në suficit. Ajo çka e karakterizon këtë qeveri janë udhëtimet jashtë vendit me taksat e qytetarëve ku nga 5998 € në vitin 2022 në vitin 2023 janë shpenzuar 31,370 € për udhëtime jashtë vendit. Ndërsa tek udhëtimet brenda vendit në vitin 2023 kemi 5989 € shpenzime a po ashtu edhe 2022 është një shifër e përafërt. Mandej ngriti shqetësimin e tij tek shpenzimet intelektuale dhe këshillëdhënese ku kërkoj sqarime nga Drejtori i Financave se si është rritur shuma nga 541 € në 52,652 €.

Isuf Jashari, drejtor i DBF-së-tha se këtë raport e kemi përgatitur në bazë të planit të rrjedhës së parasë të buxhetit të vitit 2023. Tutje shtoi se të dhënat e parashtruar në raport janë të sakta dhe realizimi i buxhetit i prezantuar është e dhënë e saktë. Pastaj njoftoi se në të hyrat vetanke kemi pasur një ngritje në inksim dhe tejkalim të planit për 17%. Mandej njoftoi se buxheti i planifikuar për 2023 ka qenë pak më shumë se 28 milion euro, ndërsa realizimi afër 27 milion apo në përqindje 95%. Më tej sqaroi se shpenzimi i buxhetit bëhet sipas kodeve ekonomik, ndërsa kur bëhet shpalosja në pasqyra financiare do të shihni sa kemi pasur shpenzim në projekte kapitale dhe sa janë marrë nga procesi përmbarimor. Lidhur me shpenzimet e përmbaruesit ceku dhe vlerësoi se nuk janë të dëshirueshme, por ato në një formë apo në një tjetër është dashur të paguhen sepse janë obligime ligjore që dalin nga kontrata kolektive.

Adnan Lahu, anëtar i kuvendit-tha se raporti është me të dhëna të sakta, por problemi qëndron në atë se cilat projekte do të hiqen nga plani buxhetor për vitin 2024 si rezultat i mungesës së mjeteve financiare dhe duhet njoftuar qytetaret e Vushtrrisë se disa projekte do të mbesin pa u realizuar si rezultat i përmbarimit.

Sylejman Mehollli, anëtar i kuvendit-falënderoj drejtorin e Drejtorisë së Financave, për informacionet e ofruara, dhe shtoj se është e vërtetë që buxhetit është shpenzuar në masën 95% por jo në dedikimin për të cilin ka votuar kuvendit sepse shumë projektet janë mbetur pa u realizuar si rezultat i përmbarimit.

Refik Maloku, anëtar i kuvendit-tha se si rezultat i pa aftësisë së kësaj qeverie mjetet do të shkonin në suficit, dhe duke dashur që këto para mos ti merr Qeveria, është shfrytëzuar mundësia që këto pare të iu jepen mësimdhënësve përmes përmbaruesit privat. Po ashtu paraqiti vërejtje tek udhëheqja e mbledhjeve nga kryesuesja e kuvendit, kur rasti më eklatant ka qenë votimi në emër të tjetër kujt, ndërsa sot ka qenë tjetërsimi i votës të një asamblisti.

Ali Januzi, anëtar i kuvendit-tha se shpenzimi i buxhetit në këtë formë nuk është i mirë, dhe kjo bënë që shumë projektet do të mbesin pa u realizuar dhe kështu nuk do ti dalim në fjalë zotimeve që i kemi marrë para qytetarëve.

Në fund të debatit lidhur me këtë pikë të rendit të ditës kuvendi pas votimit me 23 vota “për” 6 vota “kundër” aprovoj Raportin e shpenzimeve për periudhën janar – dhjetor 2023.

3. Shqyrtimi dhe aprovimi i Propozim – vendimit për pagesën e shujtave ditore për zyrtarë të administratës së komunës;

Sylejman Meholli, anëtar i kuvendit-tha se e mbështesin këtë propozim-vendim për mbështetjen sa do pak të punëtorëve të administratës komunale, por siç dihet shujtat hyn në kuadër të pagës, dhe pagesa e tyre është dashur të bëhet nga kategoria paga dhe mëditje e jo siç është propozuar nga kategoria e subvencioneve. Dhe tani shtohet pyetja se a kemi të drejtë të paguajmë shujta për punëtorët e administratës nga kategoria subvencione dhe transfere.

Faton Hyseni, anëtar i kuvendit-tha se nëse votohet ky propozim me shumën prej 3 € për shujtë kostoja vjetro është 240.000.00€ dhe kjo është shumë e madhe për buxhetin dhe kjo është një veprim popullist nga kryetari i komunës. Ai shprehu bindjen se ky vendim do të kthehet negativ nga MAPL-ja sepse është në kundërshtim me pagat. Pastaj shtoj se arsyetimi i këtij propozim nuk është hartuar si duhet ku thuhet se janë prekur nga kriza punëtorët e administratës por nga kriza janë prekur edhe kategoritë tjera si mësimdhënësit mjeket dhe kategoritë tjera. Ai propozoi që këto 240,000.00 € të ndahen në mënyrë lineare për të gjithë të punësuarit në sektorin publik në Komunën e Vushtrrisë. A po ndryshe më mirë kishte me qenë që këto mjetet të ndahen për të hendikepuarit.

Bekim Zabërgja, anëtar i kuvendit-tha se përkrahi këtë propozim –vendim si mjaft i qëlluar dhe shtoj se vlera prej 3 € është e vogël dhe duhet të rritet. Tutje shtoj se mjetet do të merren nga kategoria subvencione dhe transfere dhe kjo e bënë më lehtë të zbatueshëm këtë vendim. Gjithashtu sqaroi se me Ligjin për Pagat në Sektorin Publik, është e ndaluar që nga kategoria e pagave të bëhen pagesa të tilla. Prandaj propozoi që shuma për shujtë të jetë 4 € për punëtorët e administratës së komunës dhe kërkoj që propozimi i tij të hedhet në votim.

Adnan Lahu, anëtar i kuvendit-tha se e përkrahi këtë propozim-vendim, por mënyra e pagesës nga kategoria subvencione dhe transfere, dyshon se është e kundërligjshme dhe do të ketë problem në zbatimin e këtij vendimi.

Ali Januzi, anëtar i kuvendit-tha se vërtet është mirë që stimulohen punëtorët e administratës së komunës, por mirë kishte me qenë që edhe sektorët tjerë të përkrahen sepse kriza i ka kapluar të gjithë. Ai pyeti Drejtorin e Arsimit se sa është numri i punëtorëve të arsimit dhe i administratës ashtu që të kemi një pasqyrë të sakë për koston e shpenzimit para se kuvendi të marrë vendim.

Nurie Halili, anëtare e kuvendit-tha se si parti politike e kanë analizuar këtë propozim-vendim dhe në konsultim me kryetarin e komunës, janë ardhur në përfundim se shuma e përbalueshme për zbatimin e këtij vendim është 3 €, prandaj nëse insistohet në shuma tjera atëherë vihet në rrezik zbatimi i këtij vendim për shkak të mungesave financiare të komunës. Kërkoj nga të gjitha grupet kuvendar që të përkrahet propozimi i kryetarit të komunës ashtu që tu dalim në ndihmë punëtorëve të komunës.

Zojë Hajrizi, anëtare e kuvendit-tha se ky propozim-vendim i sjell nga kryetari i komunës, është mjaft i qëlluar, kur dihet fakti se pagat në administratën komunale janë mjaft të ulëta, dhe duke parë ngritjen enorme të çmimeve për produktet bazike, pozita materiale e punëtorëve të administratës është mjaft e rënduar. Tutje vlerësoi se vlera prej 3 € fillimisht është e mjaftueshme për të zbutur sado pak gjendjen e rënduar të këtyre punëtorëve. Kërkoj nga të gjithë anëtarët e kuvendit që ta përkrahi këtë propozim-vendim.

Agron Përçuku, anëtar i kuvendit-tha se e përkrahi këtë propozim-vendim për të ofruar ndihmë, dhe pyeti se a është i ligjshëm dhe duke u zbatuar vendimi për shujtat e zjarrfikësve. Ai shprehu drojën se edhe ky vendim do ta ndaj fatin e vendimit për shujtat e zjarrfikësve sepse do të jetë vështirë i realizueshëm. Ai potencoj se sigurimi i shujtave të ishte i mirëseardhur edhe për punëtorët e ndërmarrjeve publike në Vushtri.

Ymer Haradinaj, anëtar i kuvendit-pyeti sa në pikën 2 të këtij vendimi thuhet se mjetet do të sigurohen nga të hyrat e bartura të vitit 2023 në vitin 2024 nga kategoria ekonomike e

subvencioneve dhe transfereve, nga programi Administrata dhe Personeli, kod i buxhetor 163, nënprogrami 16324 (administrata), në shumë prej 240,000.00 € (dyqind e katërdhjetëmijë euro). Kjo nuk është e sakët për faktin se nga raporti më herët pamë se ky fond është shpenzuar dhe tani kanë mbetur vetëm 26,562.00 €, prandaj shtohet tema si do të sigurohen këto mjetet kur në fakt nuk i kemi në dispozicion për faktin se janë shpenzuar. Tutje ai ngriti çështjen e koeficientit për anëtarët e kuvendit i cili nuk është konform numrit të popullatës së Komunës së Vushtrrisë i cili është 5.7 e që duhet të jetë 5.8, kjo është pasojë e organeve të administratës së komunës të cilët nuk e kanë ngritur me kohë këtë problematikë tek ministria e linjës.

Mensur Kasumi, anëtar i kuvendit-i kërkoi falje anëtares së kuvendit znj.Fatmire Cecelia, për keqkuptimin që patën gjatë seancës së kuvendit.

Sylejman Mehulli, anëtar i kuvendit-lexoj dispozitat e nenit 46 të Ligjit për pagat në Sektorin Publik ku thuhet se me hyrjen në fuqi të këtij ligji shfuqizohet çdo dispozitë që lidhet me pagesat dhe shtesat tjera në sektorin publik. Kjo i bie se përpos kategorisë ekonomike ku merren mjetet që është gabim, po ashtu do të jetë e pamundur zbatimi i këtij vendimi edhe sa i përket Ligjit të Pagave.

Isuf Jashari, drejtor i DBF-së-tha se bazuar në Ligjin për Buxhetin e Republikës së Kosovës, nuk ka linjë buxhetore për pagesën e shujtave nga kategoria paga dhe mëditje dhe ajo mallra dhe shërbime, sikur të kishte pasur kod, këto mjete me kohë do të planifikoheshin dhe të njëjtat do të ekzekutoheshin. Çështja është se brenda për brenda kategorisë ekonomike në nënprograme mund të bëhen bartje dhe dedikime të caktuara për destinim të caktuar, por sido që të jetë verdiktin final për këtë çështje do ta japë edhe MAPL-ja.

Në fund të debatit lidhur me këtë pikë të rendit të ditës, kryesuesja e kuvendit fillimisht e hodhi në votim propozim-vendimi me shkrim nga kryetari i komunës që shuma për shujtat e punëtorëve të administratës së komunës të jetë 3.00 €, propozim i cili mori 12 vota “për” asnjë kundër asnjë abstenim, kryesuesja konstatoj se ky propozim nuk aprovohet.

Ndërsa për propozim që shuma e shujtave të jetë 4.00 € mori 16 vota “për” ndërsa 3 anëtarë të kuvendit kishin votuar edhe për propozim e parë edhe për propozimin e dytë, që kishte shkaktuar dilema sa i përket rregullsisë së këtij procesit të votimit, në këtë rast kryesuesja e kuvendit konstatoj se asnjëri nga propozime nuk aprovohet.

Në vazhdim si rezultat i pakënaqësisë lidhur me votimin në mënyrë demonstrative grupi kuvendar i LDK-së, grupi kuvendar i LVV-së dhe anëtar i kuvendit nga AAK në mënyrë demonstrative lëshuan sallën e mbledhjes, në sallë mbeten 16 anëtar të kuvendit kuorum i pamjaftueshëm për marrjen e vendimeve dhe mbledhja u ndërpre në ora:15:10.

Më datën 01 shkurt 2024 ditë e enjte ora 10:20 kryesuesja e kuvendit hapi punimet e mbledhjes së ndërprerë të datës 25 janar 2024, konstatoj se në sallë janë të pranishëm 22 anëtarë të kuvendit kuorum i mjaftueshëm për marrjen e vendimeve të plotfuqishme me pika e rendit të ditës të mbetura nga mbledhja e ndërprerë.

Munguan: Alban Bajrami, Ali Januzi, Arlind Gogolli, Edona Gashi, Fakete Dushi, Gentiana Rama, Kushtrim Hyseni, Mek Selaci, Mensur Kastri, Nasuf Aliu, Nurten Çerkezi-Gjyshinca, Spasoje Stefanoviq.

Fillimisht kryesuesja e kuvendit, njoftoj anëtarët e kuvendit, për shkakun e ndërprerjes së mbledhjes të datës 25.01.2024, e po ashtu njoftoj se për votimin e pikës për shujtat e shërbyesve civil, ka kërkuar opinion ligjor nga MAPL, rreth atij votim, dhe është në pritje të një përgjigje zyrtare.

4. Shqyrtimi dhe aprovimi i Propozim – vendimit për ndarje të mjeteve financiare - Ndërmarrjes Publike Lokale “Përparimi” SH.A në Vushtrri;

Sylejman Mehulli, anëtar i kuvendit-fillimisht kërkoj nga kryesuesja e kuvendit që të kërkoj opinion ligjor nga MAPL, edhe për sa i takon propozimit lidhur me rritjen e vlerës së subvencioneve për fëmijët e porsalindur që kishte propozuar të rritet kjo vlerë nga 120 € në 250 €, për shkak se në bazë të asaj që ka ndodhur me deklarinimin e anëtarit të kuvendit vendimi ka kaluar. Sa i takon propozim-vendimit për ndarje të mjeteve financiare - Ndërmarrjes Publike Lokale “Përparimi” SH.A në Vushtrri, deklaroi se si grup nuk do ta mbështesin një vendim të tillë, për faktin se si komunën kemi ndarë tash e disa herë shuma të mëdha parash për këtë ndërmarrje dhe në asnjë rast këto mjete nuk janë arsyetuar nga kjo ndërmarrje. Kjo shumë prej 190,000.00 € që ka ardhur është mjaft e madhe, dhe po ndahet nga kategoria subvencione, ndërsa kur po kemi çështje tjera po arsyetohemi se nuk ka mjete. Tutje shtoj se parimisht nuk janë kundër që të ndihmohet kjo ndërmarrje në fuqizimin e saj nuk janë kundër kërkesave të tyre dhe kundër atyre punëtorëve. Megjithatë kjo ndërmarrje duhet të ndërtoj një sistem dhe një shëndet financiar, pasi që tani e tutje qytetarët do të ia paguajnë faturën e mbeturinave kësaj ndërmarrje, dhe kjo do të krijoj të hyrat e veta dhe kështu nuk ka nevojë që kjo ndërmarrje të ia shpenzoj komunës subvencionet. Mandej nëse shikohet propozim-vendimi dhe arsyetimi i tij del se këtë arsyetim e ka bërë komuna, ne nuk kemi një kërkesë apo një arsyetim nga ana e N.P.L. “Përparimi” si kërkues i mjeteve, dhe kuvendi minimalisht është dashur ta ketë një kërkesë nga ndërmarrja për ti parë specifikat se çfarë kërkesash kanë për ti financuar nga ana e komunës, për shkak se duhet ditur se a është në rregull që nga mjetet e subvencioneve të komunës ndërmarrja me ble makineri punuese që janë investime kapitale. Tutje ne gjithë e dimë sa çfarë kosto ka makineria e re (kamionët për bartjen e mbeturinave), dhe me 190,000.00 €, nuk ka mundësi të blihen as dy kamion të ri dhe të certifikuar për bartjen e mbeturinave. Me këto mjete mund të blihen kamion të përdorur, siç ka ndodhur edhe më herët që janë pa garancion dhe të njëjtit nuk kanë mundur të regjistrohen. Pastaj shtohet pyetja se si ka lejuar komuna ta ngarkoj këtë ndërmarrje me menaxhim të mbeturinave kur e njëjta nuk është e gatshme, sepse nuk ka makineri, dhe tani ne si komunë duhet të investojmë vazhdimisht në këtë ndërmarrje. Në fund vlerësoi dhe potencoi se kjo pikë duhet të kthehet për plotësim me kërkesë dhe me specifikat e duhur për këtë makineri dhe më pas të silltet në kuvend për ta analizuar dhe aprovuar, në këtë formë si ka ardhur nuk duhet votuar sepse nuk i bëjmë mirë as ndërmarrjes, as komunës e as qytetarëve tanë.

Adnan Lahu, anëtar i kuvendit-tha se fillimisht nga kryesuesja e kuvendit u tentua që të tejkalohej çështja e votimit të pikës paraprake që ishte bërë shkak për lëshimin e mbledhje së datës 25 janar 2024, pa i marr sqarimet e nevojshme nga kryesuesja e kuvendit. Pastaj shtoj se nuk është hera e parë që krijohet mjegulli sa i përket votimi të pikave të rendit të ditës nga ana e kryesueses së kuvendit, dhe kjo ka ndodhur herën e fundit në dy raste apo në dy pika të rendit të ditës. Nga shikim i seancës së kaluar del se për pikën shujtat e punëtorëve të administratës kanë votuar 19 anëtarë të kuvendit, dhe kërkoj që shkresa që i është dorëzuar MAPL-së nga ana e kryesuese së kuvendit ti dërgohet të gjithë anëtarëve të kuvendit. Sa i përket propozimit për ndarjen e mjeteve për “Përparimin”, vlerësoi se nuk duhet që këtë ndërmarrje ta politizojmë sepse po tentohet nga

ana e pushtetit, por ceku se duhet lënë që ata punëtor ta kryejnë punën e vet sipas ligjit. Dyshimet kryesore janë në mënyrën e kalimit të punëtorëve nga Ndërmarrja “Uniteti” tek ndërmarrja “Përparimi” dhe pyeti se për këtë çështje a është konsultuar aspekti ligjor, se a është ligjore apo jo kalimi i këtyre punëtorëve. Ndërsa sa i përket shumës, kërkoj të shqyrtohet mundësia që kjo shumë të rritet për shkak se kjo vlerë është e vogël për ta rimëkëmbur këtë ndërmarrje. Si grup kuvendar e përkrahin këtë propozim-vendim.

Faton Hyseni, anëtar i kuvendit-tha se ka pasur gabime për sa i përket menaxhimit të seancës, dhe pikat kontestuese nga mbledhja e ndërprerë kanë kaluar. Sa i përket Propozim – vendimit për ndarje të mjeteve financiare - Ndërmarrjes Publike Lokale “Përparimi” SH.A në Vushtri, jemi të obliguar që ti ndihmojmë kësaj ndërmarrje, mirëpo edhe bordi i kësaj ndërmarrje duhet ti marr punët me seriozitet që të kujdeset mirë për punëtorët dhe pajisje e kësaj kompanie. Kërkoj nga bordi i kësaj ndërmarrje që në raport kur të vjen në mars ti përmbush këto pika si në vijim: të specifikoj në detaje për blerjen e kamionit për të cilin po dyshohet se ka pasur keqpërdorim të parave të qytetarëve, me mjetet që do ti ndajmë të regjistrohesh të gjitha mjetet që janë të pa regjistruar që çdo ditë po rrezikohet jeta e atyre punëtorëve, të shtrohet me kubëza ose të asfaltohet oborri ku po mbahen mjetet makineria e ndërmarrjes, sepse sa herë që bie shi baltoset i tërë qytetit nga këto mjete, nëse ka mundësi në bashkëpunim me komunën ta ndërrojnë lokacionin i kësaj ndërmarrje, të gjendet mënyra që punëtorëve tu paguhet shujta, sepse sipas informatave Ndërmarrja “Uniteti” veç e ka përfunduar çështjen e shujtave, kjo ndërmarrje ti merr në mbikëqyrje pastrimin e varrezave sikur ka ndodhur në komunat tjera, ti kryejnë punët që iu takojnë si p.sh zhblllokimi i kanalizimeve sepse nuk është në rregull që dy vite mos të funksionoj kanalizimi në shkollën “Migjeni” në Stanoc të Epërm, të merret me seriozitet puna e ndriçimit dhe mos të marr urdhra nga qeveria komunale për ndriçimin e lagjeve të caktuara, sepse kemi shumë vende ku dritat e dëmtuara asnjëherë nuk janë ndërruar. Në fund tha se vota e tij do të jetë pro kësaj pike për ta ndihmuar këtë ndërmarrje, por gjithëherë do të jetë zë aktiv për ti shpërfaqur keqpërdorimet kudo që ndodhin ato.

Agim Bregaj, anëtar i kuvendit-tha se kjo ndërmarrje duhet të ndihmohet që të mëkëmbet dhe duhet po ashtu të mbështetet ata punëtor. Më tej shtoj se nuk duhet të kemi ndasi politike, por duhet të jemi unik në ndihmesën e kësaj kompanie. Ai shtoj se punëtorët e kësaj ndërmarrje kanë të angazhuar 100% në interes qytetar dhe duhet të njëjtit të mbështeten. Kërkoj që ndihma për këtë ndërmarrje të rritet shuma dhe propozoi që të mbështet unanimisht.

Refik Maloku, anëtar i kuvendit-tha se krejt kishte me qenë në rregull ndarje e këtyre mjeteve sikur të mos kishte pasur politizim të kësaj ndërmarrje, dhe sikur të mos kishte qenë i vendosur pasuesi që mjetet dedikohen për blerjen e mjeteve të punës. Është me rëndësi që të kemi një specifikacion se për cilat mjete të punës po dedikohen këto para.

Bekim Zabërgja, anëtar i kuvendit-si përfaqësues i NISMES Socialdemokrate, i japë mbështetje të plotë këtij propozim-vendimi, kjo për faktin se me Ligjin për Ndërmarrjet Publike, i është dhënë mundësia që komunat të themelojnë ndërmarrje lokale, duke shfrytëzuar këtë të drejtë ligjore komuna jonë tashmë e ka të themeluar këtë ndërmarrje në pronësi 100% komunale të aksioneve. Më tej ai parashtroj një mori të detyrave, përgjegjësi dhe funksioneve të ndërmarrje të cilat duhet ushtruar konform statutit, dhe strategjisë së funksionimit të kësaj ndërmarrje ku bartës i këtyre funksioneve është komisioni i aksionarëve dhe bordit drejtues i ndërmarrjes. Meqë jemi në proces kur ndërmarrja ka marrë në menaxhim mbeturinat dhe po ashtu është regjistruar në ARBK, dhe ka marrë në shfrytëzim edhe deponimin e mbeturinave në Gërmovë, konsideron se është tepër e nevojshme aprovimi i këtij subvencioni për këtë ndërmarrje.

Ymer Haradinaj, anëtar i kuvendit-tha se nga propozim-vendimi shihet se kemi të bëjmë me një kërkesë të Drejtorisë së Shërbimeve Publike, e jo nga ndërmarrja çka nuk është dashur të jetë kështu. Pastaj shtoj se arsyetimi i këtij propozimi është tepër i mangët, për shkak se nuk e kemi të specifikuar se çfarë do të blihet me këto mjete. Kjo ndërmarrje ofron shërbime, ndërsa këto shërbime qytetarët e Komunës së Vushtrisë i paguajnë, a ceku se nuk janë kundër ta ndihmojnë këtë ndërmarrje por duhet të kemi paraprakisht një kërkesë të specifikuar se çfarë po mëtohet të bëhet me këto mjete financiare. Nëse ndahen këto mjetet atëherë ato duhet të shpenzohen sipas ligjit për financat publike. I bëri thirrje kësaj ndërmarrje që ti krye punët për të cilat është e thirrur, sepse ka kohë të gjatë që në tri rrugë në Stanoc të Epërm nuk funksionin ndriçimi publik, po ashtu kanë detyrë të merren me pastrimin e varrezave.

Isuf Jashari, drejtor i DBF-së-paraqiti sqarime lidhur me këtë pikë të rendit të ditës duke u përgjigjur në çështjet e ngritura nga anëtarët e kuvendit. Dhe shtoj se kjo shumë nuk e dëmton kategorinë dhe plani buxhetor, ndërsa mjetet do të ndahen për blerjen e pajisjeve të punës për këtë ndërmarrje ndërsa për destinime tjera nuk mund të përdoren, sepse kjo është e specifikuar me ligj.

Sylejman Mehulli, anëtar i kuvendit-tha se për të bërë të qartë sqaroi se nuk kemi kërkesë nga ana e ndërmarrjes por kërkesa ka ardhur nga Drejtoria e Shërbimeve Publike dhe kryetari i komunës. Pastaj shtoj se një kërkesë nga kjo kompani e kemi pasur në muajin dhjetor, dhe po e njëjta nuk ka specifikuar se sa do të jetë çmimi i këtyre pajisjeve.

Agron Përçuku, anëtar i kuvendit-tha se duhet të rritet kontrolli i shpenzimit të parasë në ndërmarrjen “Përparimi” duke ceku se këtë i takon ta bënë komisioni komunal i aksionarëve. Tutje shtoj se ka keqpërdorime nga menaxhmenit i kësaj kompanie dhe kjo duhet të ndalet. Pastaj shtoj nevojën që të ndryshohet rregullorja për menaxhimin e mbeturinave për faktin se kemi tarifa shumë të larta si për bizneset ashtu edhe për ekonomitë familjare.

Ferit Idrizi, kryetar i komunës-tha se kërkesës për këto mjetet nga ndërmarrja është bërë vitin e kaluar dhe në dhjetor janë ndarë 60,000.00 €, ndërsa tani duhet të ndahet edhe kjo pjesë. Kjo ndërmarrje duhet të ndihmohet sepse është e qytetarëve pa dallime dhe njoftoj tani ndërmarrja ka marrë në menaxhim edhe mbeturina dhe pastrimin e varrezave në gjithë fshatrat e Komunës së Vushtrisë, dhe ndarja e këtyre mjeteve nuk duhet specifikuar por le të jepen këto mjete si ndihmë sepse besojmë se në të ardhmen kjo ndërmarrje do të pavarësohet financiarisht dhe nuk do të ketë nevojë për ndihmë, ftoj të gjithë që ta votojnë këtë pikë këtë subvencion.

Në fund të debati lidhur me këtë pikë të rendit të ditës kuvendi pas votimit me 19 vota “për” 6 vota “kundër” kuvendi vendosi me sa vijon:

1. Me këtë vendim, ndahen mjete financiare nga buxheti i komunës – subvencione dhe transfere të vitit 2024, në shumë të përgjithshme prej 190,000.00 € (njëqind e nëntëdhjetë mijë euro) në llogari të N.P.L “Përparimi” SH.A. në Vushtri, mbështetje financiare për blerje të mjeteve të punës.

2. Mjetet në shumën e cekur si në pikën paraprake të këtij vendimi do të sigurohen si vijon:

2.1. Drejtoria e Shërbimeve Publike, kodi i programit 180, nën programi 18184, shuma 40,000.00 € (katërdhjetë mijë euro), kategoria subvencione dhe transfere.

2.2. Drejtoria për Ekonomi Bujqësi Pylltari dhe Zhvillim Rural, kodi i programit 470, nën programi 47024, shuma 98,000.00 (nëntëdhjetë e tetë mijë euro), kategoria subvencione dhe transfere.

2.3. Drejtoria për Kulturë Rini dhe Sport, kodi i programit 850, nën programi 85024, shuma 40,000.00 (katërdhjetë mijë euro), kategoria subvencione dhe transfere.

2.4. Drejtoria për Arsim, kodi i programit 920, nën programi 92120, shuma 12,000.00 € (dymbëdhjetëmijë euro), kategoria subvencione dhe transfere.

2. Kryeshefi Ekzekutiv i NPL. "Përparimi" përmes komisionit të aksionarëve të ndërmarrjes do të paraqes raport periodik dhe vjetor financiar në kuvendin e komunës lidhur me shpenzimin e mjeteve nga pika 1 e këtij vendimi.

3. Për zbatimin e këtij vendimi do të kujdeset Drejtoria për Buxhet dhe Financa, Drejtoria për Shërbime Publike dhe drejtoritë tjera kompetente.

6. Ky vendim hyn në fuqi pesëmbëdhjetë (15) ditë pas regjistrimit në Zyrën e protokollit të Ministrisë për Administrimin e Pushtetit Lokal, si dhe 7 ditë pas publikimit në faqen Zyrtare të komunës së Vushtrrisë.

5. Shqyrtimi dhe aprovimi i Propozim – vendimit për ndarje të dekoratës "Nderi i Qytetit" për Heronjtë e Kosovës: Enver Zymeri (post mortum) dhe Afrim Bunjaku (post mortum);

Sylejman Mehulli, anëtar i kuvendit-tha se në emër të grupit kuvendar të LVV-së, i mbështesim plotësisht këto propozime për nderimin e këtyre heronjve që ranë në krye të detyrës në mbrojtjen e atdheut.

Adnan Lahu, anëtar i kuvendit- tha se në emër të grupit kuvendar të LDK-së, i mbështesim plotësisht këto propozime për nderimin e këtyre figurave dhe përgëzoj kryetarin e komunës që për nder të pavarësisë së Republikës së Kosovës të nderohen këta heronj.

Ymer Haradinaj, anëtar i kuvendit-kërkoj që emri i heroit policit Enver Zymeri të shënohet drejt sepse mbiemri i tij është Zymeri.

Zojë Hajrizi, anëtare e kuvendit- tha se edhe grupi kuvendar i PDK-së e përkrah këtë propozim-vendim për nderimin e këtyre heronjve që ranë në krye të detyrës në mbrojtjen e sovranitetit dhe integriteti territorial të Republikës së Kosovës.

Pas shqyrtimit të kësaj pike të rendit të ditës kuvendit pas votimit me vota "unanime" vendosi me sa vijon:

1. Në shenjë respekti, për akte të larta sakrifice dhe heroizmi për vendin, me titullin "Nderi i Qytetit" nderohen Heronjtë e Kosovës:

1.1. Enver Zymeri – (post mortum)

1.2. Afrim Bunjaku – (post mortum)

2. Dekoratat nga pika një e këtij vendimi i dorëzon Kryetari i Komunës familjarit të të dekoruarit.

3. Për zbatimin e këtij vendimi obligohen: Zyra e Kryetarit.

4. Ky vendim hyn në fuqi pesëmbëdhjetë (15) ditë pas regjistrimit në Zyrën e protokollit të Ministrisë për Administrimin e Pushtetit Lokal, si dhe 7 ditë pas publikimit në faqen Zyrtare të komunës së Vushtrrisë.

6. Shqyrtimi dhe aprovimi i Propozim – vendimit për financim të shkollimit të fëmijëve të Heronjve të Kosovës: Enver Zymeri dhe Afrim Bunjaku;

Ymer Haradinaj, anëtar i kuvendit-kërkoj që për djalin e heroit Enver Zymeri, të bëhet pagesa në mënyrë retroaktive për dy pagesa që ka bërë në rastin e ndjekjes së mësimit për të rritur në shkollën teknike.

Pas shqyrtimit të kësaj pike të rendit të ditës kuvendit pas votimit me vota “unanime” vendosi me sa vijon:

1. Me këtë vendim, fëmijëve të Enver Zymerit, dhe Afrim Bunjakut, Heronj të Kosovës, iu financohet shkollimi në të gjitha nivelet e arsimit nga buxheti i komunës, subvencione dhe transfere.
2. Mjetet financiare për financim të shkollimit do të jepen në formë të bursave nga buxheti i Drejtorisë për Arsim.
3. Për zbatimin e këtij vendimi do të kujdesen Kryetari i Komunës dhe Drejtorja për Arsim.
4. Ky vendim hyn në fuqi pesëmbëdhjetë (15) ditë pas regjistrimit në Zyrën e protokollit të Ministrisë për Administrimin e Pushtetit Lokal, si dhe 7 ditë pas publikimit në faqen Zyrtare të komunës së Vushtrrisë.
7. Shqyrtimi i Propozim – vendimit për ndryshim dhe plotësim të vendimit për KKSB-në;

Pas shqyrtimit të kësaj pike të rendit të ditës kuvendit pas votimit me 17 vota “për” të tjerat “abstenim” vendosi me sa vijon:

1. Me këtë vendim ndryshohet vendimi 01 Nr. 101/23 date.27.04.2023 për themelimin të Këshillit Komunal për Siguri në Bashkësi si vijon:

1.1 Në paragrafin 1, pika 1.3, z. Albanez Tahiraj, caktohet anëtar i KKSB-së kurse z. Dardan Abazi, pushon të jetë anëtar i KKSB-së, sipas nenit 4, pika 1.9 të Udhëzimit Administrativ Nr. 27/2012 MPB – 03/2012 MAPL për Këshillat Komunal për Siguri në Bashkësi.

2. Për zbatimin e këtij vendimi obligohen: Zyra e kryetarit dhe Sekretaria e Kuvendit.

3. Ky vendim hyn në fuqi pesëmbëdhjetë (15) ditë pas regjistrimit në Zyrën e protokollit të Ministrisë për Administrimin e Pushtetit Lokal, si dhe 7 ditë pas publikimit në faqen Zyrtare të komunës së Vushtrrisë.

8. Rishqyrtimi i vendimit të kuvendit nr.289/23 i datës 28.12.2023 për ofrimin e ndihmës financiare për z.Nasuf Aliu;

Pas shqyrtimit të kësaj pike të rendit të ditës kuvendit pas votimit me vota “unanime” vendosi me sa vijon:

1. Me këtë vendim z. Nasuf Aliu, anëtar i Kuvendit të Komunës së Vushtrrisë i ofrohet mbështetje financiare në shumë prej tremijë euro (3000.00 €) për nevoja të shërimit nga një sëmundje serioze që është diagnostikuar kohëve të fundit.

2. Mjetet financiare të cekur në pikën paraprake të këtij vendim do të sigurohen nga buxheti i komunës – kategoria subvencione dhe transfere, **Programi Buxhetor (16024)-zyra e kryetarit.**

3. Për zbatimin e këtij vendimi obligohen: Drejtoria për Buxhet dhe Financa dhe Zyra e Kryetarit të Komunës.

4. Ky vendim hyn në fuqi shtatë (7) ditë pas publikimit në faqen zyrtare të Komunës së Vushtrrisë.

9. Shqyrtimi dhe aprovimi i Propozim – vendimit për shfuqizimin lidhur me miratimin e Planit për Integritet;

Pas shqyrtimit të kësaj pike të rendit të ditës kuvendit pas votimit me vota “unanime” vendosi me sa vijon:

1. Me këtë vendim shfuqizohet vendimi i Kuvendit të Komunës 01Nr. 157/23 datë 29.06.2023 për miratimin e Planit Komunal për Integritet për periudhën 2023-2025.

2. Obligohet kryetari i komunës që të merr masat e nevojshme për të miratuar Planin Komunal për Integritet për periudhën 2024-2026.

3. Me hyrjen në fuqi të këtij vendimi pushon të vlej vendimi i Kuvendit të Komunës 01Nr. 157/23 datë 29.06.2023 si dhe Plani Komunal për Integritet 2023-2025.

4. Ky vendim hyn në fuqi pesëmbëdhjetë (15) ditë pas regjistrimit në Zyrën e protokollit të Ministrisë për Administrimin e Pushtetit Lokal, si dhe 7 ditë pas publikimit në faqen Zyrtare të komunës së Vushtrrisë.

10. Shqyrtimi dhe aprovimi i Propozim – vendimit për miratimin e nismës të kryetarit të komunës për bashkëpunim ndërkomunal;

Ferit Idrizi, kryetar i komunës-njoftoi se kjo iniciativë ka buruar nga ana e tij si kryetar i komunës që në bashkëpunim me këto komuna të iniciohet procesi për ndërtimin e rrugës regjionale që fillon nga fshati Barilevë-Kozaricë-Dumnicë e Epërm-Konovik-Vesekoc-Kurillovë e që lidhet me rrugën e Bajgorës e që i lidhë Malet e Shalës së Bajgorës me qëllim të zhvillimit të agroturizimit dhe zhvillimit ekonomik. Kjo kërkesë është nënshkruar nga të gjithë kryetaret e komunave dhe është proceduar tek Ministria e Infrastrukturës e cila e ka mbështetur një kërkesë të tillë. Në konsultim me zyrtaret e ministrisë së linjës është marrë obligim që komunat të bëjnë hartimin e projektit dhe studimin e fizibilitetit, ndërsa Ministria e Infrastrukturës të bëjë financimin e këtij projekti.

Pas shqyrtimit të kësaj pike të rendit të ditës kuvendit pas votimit me vota “unanime” vendosi me sa vijon:

1. Miratohet nisma e Kryetarit të Komunës së Vushtrrisë 02Nr. 47/24 datë 23.01.2024 për bashkëpunim ndër komunal në mes të Komunës së Vushtrrisë dhe Komunave: Mitrovicë e Jugut, Obiliq, Prishtinë dhe Podujevë, për realizim të projekteve me interes të përbashkët.

2. Sipas pikës 1 të këtij vendimi, miratohet propozim vendimi për financim të përbashkët të studimit të fizibilitetit si dhe hartimit të projektit detaj/zbatues për ndërtimin e rrugës: **Barilevë-Kozaricë-Dumnicë e Epërme-Kunovik-Vesekoc-Kurillovë-Bajgorë.**

3. Autorizohet Kryetari i Komunës së Vushtrrisë që të filloj konsultimet me Kryetarët e Komunave nga pika 1 (një) e këtij vendimi për të përgatitur Draftin e Marrëveshjes për bashkëpunim ndërkomunal për financim të përbashkët të studimit të fizibilitetit dhe hartimit të projektit detaj.

4. Ky Vendim hynë në fuqi pesëmbëdhjetë (15) ditë pas regjistrimit në Zyrën e protokollit të Ministrisë për Administrimin e Pushtetit Lokal, si dhe shtatë (7) ditë pas publikimit në faqen zyrtare të Komunës së Vushtrrisë.

5. Vendim iu dërgohet : MAPL-së dhe Kryetarëve të Komunave: Prishtinë, Mitrovicë e Jugut, Obiliq dhe Podujevë.

11. Shqyrtimi dhe aprovimi i Propozim – vendimit për formimin e komisionit lidhur me shqyrtimin e gjendjes për ofrimin e ndihmës për fëmijët e porsalindur;

Sylejman Mehulli, anëtar i kuvendit-tha se lidhur me këtë pikë konsideron se ka kaluar në seancën e kaluar, në pikën e rendit të ditës ku është propozuar rritja e përkrahjes financiare për fëmijët e porsalindur në vlerën prej 250 € nga numri i pjesëmarrësve me votim të thjesht vendimi është aprovuar, ka mbetur vetëm konstatimi nga ana e kryesueses të cilin konstatim nuk e keni bërë, këtë konstatim keni provuar ta bëni përmes video-xhimit të seancës ky video incizim është prerë apo nuk është prezantuar nga zyrtari përkatës, e vetmja votë që ka qenë kontestues anëtari i kuvendit ka dal publikisht dhe e ka deklaruar votën e tij. Prandaj për grupin e ti kuvendar tashmë ky vendim është aprovua dhe vetëm duhet ti kaloj filtrat e MAPL-së dhe fëmijët e porsalindur të Vushtrrisë të gëzojnë këtë të drejtë. Diferenca e aspekti financiar të këtij vendimi është pak më tepër se 100,000.00 €, dhe kërkoj që pasi të merr vlerësimin ky vendim të zbatohet.

Adnan Lahu, anëtar i kuvendit-tha se si LDK janë që të rritet kjo shumë për fëmijët e porsalindur, sepse dihet që ky vendim ka ardhur pikërisht në qeverisjen e LDK-së. Mirëpo pasi kanë biseduar me Drejtorin e Financave, ata janë që të formohet një komision dhe kështu të mos merren vendime të cilat nuk do të mund të zbatohen.

Faton Hyseni, anëtar i kuvendit-edhe njëherë deklaroi se për atë pikë vota e tij ka qenë pro, sepse për të nuk është me rëndësi se kah vjen ideja e rëndësishme është të kemi një përparim. Tutje shtoj se derisa Komuna e Rahovecit një komunë më e vogël se Vushtrria po ndan deri në 500 € për fëmijët e porsalindur, pse komuna jonë nuk e bënë një gjë të tillë.

Sylejman Mehulli, anëtar i kuvendit-tha pushteti aktual punon me dy standarde, nuk kërkon analizë financiare dhe komision për ndarjen e mjeteve për Kompaninë “Përparimi”, ndërsa kërkojnë komisione të veçanta për rritjen e subvencioneve për fëmijët e porsalindur. Nuk kërkohet

analizë, dhe ndahen mjete për një ndërmarrje e cila fare nuk ka parashtruar kërkesë dhe pa pasur asnjë specifikë se ku do të shkojnë ato jete ky është standardi i funksionimit të kësaj qeverie.

Agron Përçuku, anëtar i kuvendit-sqaroi se sikur ka ndodhur një ngatërrim sepse propozimi atë ditë në seancë për rritjen e subvencioneve për fëmijët e porsalindur ka qenë propozim për të hyrë në rend dite e jo që është marr vendim për këtë çështje.

Refik Maloku, anëtar i kuvendit-tha se nuk e kupton dualitetin e standardeve të përdoruar, derisa më herët u ndan 190,000.00 € pa asnjë specifikacion se ku do të shkojnë ato mjete, tani dalin dilema sa i përket rritjes së subvencioneve për fëmijët e porsalindur kur dihet saktë se për çfarë do shfrytëzohen ato mjete.

Ferit Idrizi, kryetar i komunës-tha se nuk e ka problem se kush e propozon një pikë në rend dite, por problem është buxheti dhe zbatimi i vendime në mungesë të buxhetit. Pastaj shtoj se komuna tjetër e cila ka marr vendim për subvencion ka marr vendim vetëm për fëmijët që lindin në maternitetin e asaj komuna, nëse e marrim këtë formulë, atëherë siguron se ka mjete për zbatim të vendimit, por e vërteta është se krejt lindjet nuk kryhen në Vushtrri, por kryhen edhe në Mitrovicë e shumica në Prishtinë. Prandaj ne si komunë jemi duke i subvencionuar të gjithë fëmijët që janë rezident të Komunës së Vushtrrisë. Më tej nuk nevojë të formohet komision për këto çështje, sepse Drejtori i Financave do të vjen dhe do të raportoj me shifra të sakta para kuvendit, e nëse ai prezanton shifra të rrejshme dhe jo reale atëherë keni të drejt të formoni komision. Prandaj ai i sugjeroi kuvendit që të kërkojnë nga Drejtori i Drejtorisë së Financave një informatë të qartë lidhur me të gjitha subvencionet dhe të bëhet një analizë financiare lidhur me këtë çështje, nëse ka hapësirë atëherë do aprovojmë këtë rritje

Sylejman Mehulli, anëtar i kuvendit-tha se qëllimisht këtu po tentohet të devijohet e vërteta, sepse askush nuk ka dilema në pasqyrat financiare. Mbledhjen e kaluar është votuar për të hyrë në rendin e ditës propozimi për rritjen e subvencioneve për fëmijët, kryesuesja nuk e ka numëruar një votë, janë incizimet, ka pasur dilema të një asamblistë i cili doli publikisht deklaroi se vota e tij ka qenë pro propozimit për rritjen e subvencioneve në 250 €. Kemi bërë përpjekje që ajo votë të konstatohet përmes video-incizimit dhe nuk kemi mundur, ndërsa kryesuesja nuk e ka konstatuar drejt situatën lidhur me epilogun e votimit të kësaj çështje.

Agron Përçuku, anëtar i kuvendit-tha se nuk e ka të qartë se për çfarë komisioni po bëhet fjalë, nëse veç ka vullnet atëherë është dashur që vjen sot propozim-vendimi për formimin e atij komisioni.

Në fund të debatit lidhur në kuadër të pikës së rendit të ditës Propozim – vendimi për formimin e komisionit lidhur me shqyrtimin e gjendjes për ofrimin e ndihmës për fëmijët e porsalindur, kuvendi pas votimit me 14 vota “për”, asnjë “kundër” dhe asnjë abstenim vendosi me sa vijon:

Kuvendi i Komunës së Vushtrrisë, në mbledhjen e mbajtur më datë: **01 shkurt 2023**, ka shqyrtuar Propozim – vendimit për formimin e komisionit lidhur me shqyrtimin e gjendjes për ofrimin e ndihmës për fëmijët e porsalindur, dhe në kuadër të kësaj pike të rendit të ditës është aprovuar sugjerimi i kryetarit të komunës ashtu që Drejtorisë për Buxhet dhe Financa i parashtron këtë:

Rekomandim:

Kuvendi i Komunës së Vushtrrisë ka miratuar rekomandimin e kryetarit të komunës ashtu që Drejtorja për Buxhet dhe Financa e Komunës së Vushtrrisë, të bëj një analizë gjithëpërfshirëse,

buxhetore dhe të dalë me një raport se a ka mjete financiare për rritjen e subvencioneve për përfituesit fëmijët e porsalindur të Komunës së Vushtrrisë, ashtu që vlera financiare prej 120 € sa është aktualisht të rritet në 250 €, sipas propozimit të dhënë nga shefi i grupit kuvendar të LVV-së z. Sylejman Meholli.

Obligohet Drejtoria për Buxhet dhe Financa e Komunës së Vushtrrisë, që ta informoj kuvendin e komunës në një afat sa më të arsyeshëm.

12. Pyetje dhe përgjigje:

Faton Hyseni, anëtar i kuvendit-deklaroi se në takimin e fundit që ka pasur me kryetarin e komunës në zyrën e tij, ai i ishte drejtuar se koalicion nuk ka lidhur me z.Faton Hyseni por me kryetarin e Degës së AAK-së në Vushtrri, gjë për të cilën ka pasur të drejtë, dhe kishte thënë se është i lirë që të votoj sipas bindjes së tij, dhe pikërisht esh kështu është duke vepruar, sepse nuk i lejon kredibiliteti i tij moral e njerëzor të bëhet marjonetë e askujt. Prandaj pyetja e tij është pse dërguat drejtorin tuaj në nivel qendror për të ia ndalur zërin atij pasi që ai është i lirë.

Ferit Idrizi, kryetar i komunës-tha se me Faton Hyseni, ka rrugëtuar gjatë, dhe nëse i ka thënë ndonjë fjalë që e ka lënduar atëherë ai i kërkon falje, por ai u zotua se ja ku i ka drejtoret nga subjekti i tij le të flasin nëse ai ka kërkuar që të ja ndal zërin anëtarit të kuvendit z.Faton Hyseni, sepse nuk e lejon veten në bien në pozicione të tilla, për të kërkuar diçka që nuk është në natyrën e tij.

Sylejman Meholli, anëtar i kuvendit-kërkoj nga kryesuesja e kuvendit që të jetë shumë më e përpiktë në zbatimin e rregullores së punës së kuvendit dhe kërkoj sqarime se çfarë aprovimi ndodhi dhe e kaloi kryesuesja e kuvendit nuk e kemi të qartë dhe dëshirojmë të dimë. Ku mbeti pika për tu formuar komisioni që ishte në rend dite, a u votua, a u ndryshua nëse po si ka mundësi të ndryshohet pika gjatë trajtimit të rendit të ditës dhe dëshiron një shpjegim juridikisht të kësaj çështje. Prandaj ai kërkoj nga kryesuesja e kuvendi që të zbatohet rregulloren dhe mos ta sjellë kuvendin dhe anëtarët e tij në kësi lloj situatash të palakueshme kur nuk dihet se për çfarë po votohet.

Adnan Lahu, anëtar i kuvendit-tha se nga mbledhja e kaluar u pajtuam që të shkohet me formimin e një komisioni ku do të konstatohej nëse kemi mjete për ti rritur këto subvencione, dhe me qëllim që të mos merret vendim pa pasur mbulueshmëri financiare, dhe tani është dashur që ajo pikë të dal në votim, por nuk ndodhi dhe kësaj kjo formë e udhëheqjes së kuvendit është për keqardhje dhe po i fyen anëtarët e kuvendit. Pastaj shtoj se kryetari i komunës kishte premtuar se për afatin prej 6 muajsh do të rregullohet furnizimi me ujë të pijes, por shtroj se a e din se përse nuk ka pasur ujë Vushtrria për 12 vitet e qeverisjes së PDK-së, sepse pikërisht qeverisja e tyre ka ndërtuar një fabrikë të ujit në vendin e gabuar, sepse vendi ku është vendosur është nën nivelin e duhur për ta furnizuar të gjithë qytetin me ujë dhe kjo bënë që duhet të kemi sistem të pompimit. Aty ku gjendet fabrika, nuk mundet të furnizohet me ujë i gjithë qyteti me rënje të lirë, dhe detyrimisht është dashur të përdoret sistemi i pompimit.

Refik Maloku, anëtar i kuvendit-tha se para dy viteve e kishte pyetur kryetarin e komunës, se si është çështja e furnizimit me ujë të pijshëm për rajonin e Lumit të Kuqi siç quhet, dhe tani përsërit se deri ku ka shkuar ky projekt.

Ferit Idrizi, kryetar i komunës-tha se ka pasur përpjekje të pareshtura për ta lëshuar ujin e pijshme, por ka shumë problem dhe ndër to është fakti se kur është bërë instalimi i rrjetit të ujësjellësit është bërë pa projekt, sepse është shkuar në sistem të pompimit në sistem të

hidroforëve, dhe pompat janë vendosur më tepër se 1 km larg burimit të ujit. Ai njoftoi se është bërë projekti që të bëhen disa nën bazën dhe të eliminohet sistemi i pompimit i cili po del se nuk është funksional.

Jeton Gjaka, anëtar i kuvendit-njoftoi se pasi vjen nga ai rajon e një shumë mirë dhe deklaroi se fabrika është e vendosur në vendin më të mirë të mundshëm. Po ashtu ai kërkoi nga kryesuesja e kuvendit që jap sqarime lidhur me mënyrën e votimit, në rastin kur kemi dy propozime.

Refik Maloku, anëtar i kuvendit-tha se në kohën sa ka qenë drejtor nuk është vendosur sistemi i pompimit për ujin e pijshëm.

Sylejman Mehulli, anëtar i kuvendit-përsëriti dhe kërkoi përgjigje për atë se çfarë ka ndodhur me disa pika të rendit të ditës si ajo për shujta e punëtorëve të administratës, mandej për subvencionet e fëmijëve, sepse kryesuesja e kuvendit me qëllim po i bishton përgjigjes në këto pyetje kërkoi që këto tema të dihen se si kanë përfunduar. Po ashtu përsëriti se çfarë u votua para kësaj pike, ku krejt tjetër ishte në rendin e ditës e tjetër gjë u votua këtu. Ai kërkoi nga mediat që ta pasqyrojnë drejt këtë seancë të kuvendit se çfarë po ndodh, e po ashtu kërkoi nga MAPL të bëjë një analizë të mirëfilltë dhe të shikoj se si dhe sa po zbatohet rregullorja e punës së kuvendit në Kuvendin e Komunës së Vushtrrisë.

Melihate Basholli-Latifi, kryesuese e kuvendit- sqaroi se lidhur me çështjen kontestuese të votimit, ka kërkuar opinion ligjor nga MAPL, dhe është në pritje të një përgjigje zyrtare se si të veprohet dhe do të veproj sipas udhëzimeve të MAPL-së. Sa i përket çështjes së formimit të komisionit, ceku se në bazë të diskutimeve erdhe në konkluzion se duhet të aprovohet rekomandimi i kryetarit të komunës, për ti marrë nga drejtorja e Financave informacionet e nevojshme, dhe poenta ishte që pika për formimin e komisionit të shtyhet për seancën e radhës.

Mbledhja përfundoi në ora: 12:10.

Bastri Duraku



Procesmbajtës

Melihate Basholli-Latifi



Kryesuese e Kuvendit